THE MUCKLE SPATE OF TWENTY-NINE

Being some memorials o' the Muckle Spate in auchteen twenty-nine, as the same exhibited itsel' I' the Howe o' Feugh to the een and imagination o' an indwaller i' the Parish o' Stra'an.

Fytte the First

Shawin' the oncome o' the spate, alang wi' the general ruction ensuin' an' the special mishanters occurin' to the Dyster o' Dalsack; at Mill o' Clinter: to Ennnochie's cluckin' hen; to the farmer o' Fytestane; at the Mill o' Strachan; to the Souter o' Dalbreck; to the Wyever o' the Strathy; and to the Cairder at Haugh o' Strachan.

Tho' I was only but a bairn In auchteen twenty-nine, The mem'ry o' the Muckle Spate Has never left my min'.

We had a byous weety time, A week, or maybe mair, The eident rain kept pelting on, Nae single hoor wis fair;

An' then for four-an'-twenty hoors There followed a doonfa' The like o' which, sin' Noah's flood, The warl' never saw.

The thunner rum'lt roon the hills, The howes were in a soom, We thocht the warl', owergaen wi' age, Drew near the crack o' doom

We thocht the tulzie wis renew't Wi' yon uncanny ban'; We thocht the deil hed speelt the lift, An' got the upper han';

We thocht the promise wis forgot To droon the warl' nae rnair. We thocht - we kent na' fat to think, Oor hieds wi' thocht were sair.

It wis upon a Fiersday nicht, As near as I can think, When this ooncommon ootpoor fell Fae skies as black as ink:

An' when we raise at skriek o' day, In ilka bit ravine, A reamin' burn cam' rum'lin' doon Faur burn wis nane thestreen.

The Feugh cam' rairin' doon fae Birse, An' swept the haughs o' Stra'an; Horse, pigs, an' kye were droont i' Dye, An' sheep by scores in A'an.

An' yarn reels, an' spinnin' wheels, An' bowies, cogs, and caups, An' tables, chairs, an' cutty steels, On ane anither's taps;

An' girnels, aumries, washin' tubs, An' smuggled whisky kegs; Cheese chessils, butter kits, an' kirns, An' couple bauks an' legs;

An' divots, thack, an' timmer lums, An' rantle trees wi' cruiks, An' backets, baith for aise an' saut, An' racks for plates an' buiks;

An' barn-fans, an' flails, an' fleers, An' canasses an' secks; An' cheeks o' doors, an' doors themsel's, Wi' broken ban's an' snecks:

An' firlot measures, corn scythes, Wi' tang or forkit sneds; An' harrows, barrows, cairts, an' pleughs, An' neep machines an' sleds;

An' skeps o' bees, an' sowen sieves, An' skulls, an' tatie creels; An' reets, an' trunks, an' taps o' trees, An' palin' bars, an' deals,

An' sides, an' reefs o' sheds for peats, Or sheds for haudin' nowt, And hay that steed in soos or colls, Or lay into the 'bout;

An' bere an' aits in sheaves or taits, Weel haint the simmer through, Ther'out in rucks or i' the barn, Weel biggit in a mow,

And ither things that I've forgot Amid sac gryte a steer, Or winna inter into rhyme For crabbit names or queer,

Gaed chasin' ane anither doon Far, far ayont oor ken, For we at hame were bairns a', The aul'est barely ten.

And noo my Muse wad no' refuse To tell you scores o' things She notit as by-ordinar', But she maun cour her wings;

For sorra tak' that printer chiel, He winna listen till 'er; He tells me that to print her screeds, Wud cost a soud o' sitter.

So I maun only wyle a fyou, An' maybe no' the best, An' leave till times o' better trade, Or never print the rest;

Nor need I wander far abroad, For me 'twill be eneuch To sing fat childish senses grasp'd, Alang the Howe o' Feugh.

The dyster, like a drookit rat, Escapit fae Dalsack,

Wi' naething save his harn sark Upon his dreepin' back.

He saved his life, an' little mair, By perfect speed o' fit, But lost his shop an' a' his claith, His bowies, pots, an' lit.

At Clinter Mill a mealer lay, The aits had come fae Knowes, Unweigh't, unseckit i' the troch, As gweed's a dizzen bowes;

Plish-plash the water skelpit in, Across the disty fleer, Owre-lap the troch, an' in a trice The mealer wis caul' steer.

At Ennochie a cluckin' hen Wis sittin' in a kist, Baith it an' her were sweelt awa' Afore the creatur' wist;

We saw her passin' near Heugh-head As canty as ye like, Afore her ark a droonit stirk, Ahint a droonit tyke,

An' ran anent her doon the banks For half-a-mile or mair, Observin' that, at ilka jolt, She lookit unca scare,

As gin she said within hersel' -'Faur-ever am I gyaun? I never saw the like o' this In Birse nor yet in Stra'an.

Faur ever am I gyaun, bairns? Nae canny gait, I doot; Gin I cud but get near the side, I think I wad flee oot.'

We left her near the Burn o' Frusk, An' speculatit lang Gin she were carri't to the sea Afore her ark gaed wrang,

An' may be spairt by Davie Jones To bring her cleckin' oot, Gin she wad rear them like a hen Or like a water coot?

Twa muckle rucks o' fairnyear's aits Wer' stanin' at Fynestane When Fytie gaed to bed at nicht; He raise, an' there wis nane!

Noo, Fytie wis a gethert carle, Fa weel the loss cud bide; But yet he lap as he were wud, An' poo't his hair an' cry't –

'We're herrit, wife! we're herrit clean!

Faur, faur's the fusky pig? Oor rucks o' corn are baith awa', An' sae's the timmer brig!'

An' Fytie's Brig, the Lady's Brig, An' mony brigs forbye That spate sent rumblin' doon the Feugh, Or doon the A'an an' Dye.

A timmer brig ye wadna seen Faure'er yer fit micht fa', An' barely ane o' lime an' stane That hedna lost a wa'.

At Mill o' Stra'an, the millert's man Wis busy grinnin' aits, Wi' a' his thochts on Mary Bell, An' nane to spare for spates.

When 'clipper-clapper' flew the mill, As ne'er flew mill afore; An' helter-skelter gush'd the spate Through ilka hole an' bore.

Nae langer noo on women folks Scared Sandy's notions ran, There wis eneuch o' thochtfu' wark For maister an' for man;

Nor yet for a' 'at baith cud lave, Or dicht, or dem, or close, Wis ever seen at Mill o' Stra'an So big a caup o' brose.

A smatchet o' a lassie serv't The souter at Dalbreck, He lost a dizzen harn sarks Through her entire neglec'.

She left them bleachin' o' the green, Wi' ither claes a curn; The spate cam' on upo' the nicht, An' a' gaed doon the burn.

A wudder souter lingan ne'er Through leather tried to rug; He took the smatchet wi' his neive A riesle on the lug.

Tak' that,' quo' he, 'ye careless shard, l'se gar ye wear my marks, Yer trachle for a dizzen years--Wad no' renew my sarks!'

The sharger sat an' hoor an' grat Upo' the deece the but Until her e'en were baith as red As collops newly cut.

'I'll tell my mither noo,' she cried, As sure as I 'm alive, She'll gar the souter smairt afore The lawwers o' Stanehive.' The wyever o' the Strathy's leem Wis connacht oot-an'-oot, His wobs o' wincy dawdlt waur Nor any scoorin' cloot.

His pirns an' clews, an' worset hesps, Beclairtit i' the glaur, Till 'twud hae taen a clever chiel To tell ye fat they war.

A dowie man the wyever wis, When to the shop he comes, 'Preserve's,' he cries, 'the hale concern's Nat worth a bunch o' thrums!'

The Cairdin' Mill at Haugh o' Stra'an, The eelie pigs an' woo', Were ruint, smasht, or sweelt awa', Alang wi' Cairdy's coo.

Fat wye the Cairder an' the wife, Wi' little'ns twa or three. Got aff wi' life, I dinna ken, An' winna tell a lee;

For tho' I ken that mony ane Fa han'le pen an' ink, Wad no' regaird a lee or twa To gar their story clink,

Yet I am nae romancin' bard In lees I dinna deal, But only tell the stories learnt In natur's simple skweel.

Fytte the Second

Shawin' the mishanters occurin' to Johnny Joss the Cadger, Davie Durrit, aul' Willie Wilson, peer Tam McRory, Cammie, my Sister's Lam', an' aul' Meg Mill.

A cadger body, Johnny Joss, Nae far fae Bogendreep, Lost shawltie, cairtie, creels an' a' At ae unlucky sweep.

The shawlt wis droonit at the sta', The cairt washt fae the shed, An' Johnny made a nar' escape Fae droonin' in his bed;

But aifter a' the splore wis owre. The body, far fae blate, Contrived to turn to gweed account The losses by the spate.

He got a beggin' paper drawn By some buik-learnt chiel, An' beggit Banchory, Birse, an' Stra'an An' bits o' Dores as weel;

An' took a soud o' siller up, An' when his pouch wis foo, Crap slyly o'er the Cairn o' Month Wi' very sma' ado,

An' took a tackie i' the Mearns, An' got a braw gudewife, An' lived a much respectit man The remnant o' his life.

He wadna win in twenty years By sellin' stinkin' skate The half o' fat he got in lieu O' losses by the spate.

Fae Caulmeer Davie Durrit ran The skeely wife to ca', But ere he got to Bowsie's Haughs, The water cover't a.

He got a horse at Templeton, An' boldly ventured o'er; He cross't the brig, he pass'd the kirk, He lan't at Lerachmore;

The skeely wife lap fae her bed, An' buskit in a glint Douce Dayie took his seat afore, The skeely wife ahint,

An' Davie got her doon the brae Wi' neither jolt nor jirk An' cantily they pass'd the manse An' cantily the kirk;

But when they turn't the merchant's shop, For a' his canty cawin', I wadna gyang across,' cried she, For a' the wives o' Stra'an!

Preserve's! the water's ower the brig, An' oot at baith the en's; Turn back the beast; else I'll loup doon, Though I sud brak my banes!'

The ne'er a word douce Davie spak' But gae his beast a lick, An' doon the road, an' owre the brig, He plash'd through thin an' thick.

The skeely wife she pray't an' bann't,. An' grat for fear an' spite; But ne'er a word douce Davic spak', For a' that she could flyte.

Wi' stick an' heel, owre stream an' peel, He rade wit micht an' main, But to his pairtner's angry words He answerin' word gae nane;

Till baith were safe afore his door, Then lichtly he lap doon, 'Get aff the beast, gyang in,' cries he, 'An' try an' gie's a loon.

Gyang in at ance, an' ben the boose.

It's eeseless noo to fryne; Sae tak' a dram an' dae yer wark, For I'm seer I've deen mine.'

Afore an hoor a loon was born, I min' the little'n weel, 'A gyangrel at his mither's fit, When we were at the skweel.

An' aye the howdie eest to brag, Through a' her aifter life, Hoo bravely she rade through the spate To Davie Durrit's wife.

Aul' Willie Wilson lost his coo, An' never got anither, He left her near the waterside A' nicht upo' the tether.

She brak' the tether in a fleg, An' clam upon a heugh, But mist a fit, or took a dwam, An' tum'lt i' the Feugh,

She sank into the muckle pot, Aneth the kelpie's stane, An' afterwards wis swirl't awa',-He lost her skin an' bane.

Peer Tam McRory's breedin' soo, Gaed doon the Bum o' Cammie, A muckle loss, an' sa'ir heart-brak' Baith to the wife an' Tammie,

For they were just expectin'. pigs, An' pigs were gey an' dear, The litter wad 'a paid the rent, An' left a note, or near.

O' Cammie's hay gaed doon the Feugh, As gweed's a dizzen stanes, But for the loss richt weel I wat He made a braw amends.

I maunna say the carlie wrang, He's lost the vital spank, But troth for weeks he gather't hay Fae Cammie to Deebank.

For ilka stane o' hay he lost 'Twas said he gather't ten, An' aifter a' wis deen declair't He hadna half his ain.

He gethert *up* as well as *doon*, An' maybe wisna wrang, For fa cud tell in sic a spate Fat gait their gear micht gang

My sister lost the brocket lam' She got fae Tammie Durrit -`Twis said she micht 'a got a croon O' gweed fyte siller for it. Peer silly ted, it brak' its string An' ran upo' the brae, An' saw a sheep come bleatin' doon Upon a coll o' hay.

We did na ken - it micht 'a thocht The bleatin' sheep its mither, At onyrate it jumpit in, An' baith were droon't thegither.

But wae's my hairt for aul' Meg Mill, Far kent as 'Birlin' Meg,' Fae Persie to the mou' o' Feugh Nane got a gryter fleg.

Her liefu' lane in her wee hoose She span the thread like Fate, Till splash against her ain kailyard She heard the muckle spate.

'Preserve's! and guide's! fat's this?' cried Meg 'The kelpie seer eneuch! He's never met wit sic a spate Sin' ever Feugh wis Feugh;

It's clean owregaen him in his pot, An' fairly forced to flee, He's come to howff in my kailyard, Or scrammle up a tree.

'An' glaid am I the coordly klype. Has got's deserts for ance, To punish him for fleggin' baims, An' folks fa live them lanes.

But, safe me! I maun haud my tongue, For gin the klype come ben, He'll harl me awa' at ance To Satan's fiery den.'

An' here sic fears assail'd her min' O' kelpie, spate, and deil, That fae her fingers drapt the thread, An' ceased the birlin' wheel;

Her hairt lap fairly till her mou', An' thumpit like a drum; She heard anither splash, and thocht Her hinner en' had come;

She luiket but, she luiket ben, To window and to door, An' aye she heard the ither splash, An' aye the ither roar.

She luik't to window and to door, But dared na ventur' oot; She scrammIt to the rantle-tree, An' warsIt i' the soot.

Wi' a' her micht an' main she tried To lift the timmer lum, In hopes o' creepin' through the hole, But oot it wadna come.

She cudna warstle through the lum, Nor through the divot reef; O' a' the ills that e'er cam' doon, That nicht's were seer the chief.

She reestit o' the rantle-tree
Till it wis braid daylicht:
Then doon, an' startit for the hills,
Ye ne'er saw sic a sicht.

'Noo, faur ye gyaun?' quo' Cammie's herd; Quo' Meg, 'To Clochnaben; Rin, laddie, rin, an' leave yer beasts, The wordles at an en'!

The days hev come fan Scriptur' says The fouks in toons fa be, Sall leave their hames an' wor'dly gear, An' to the mountains flee

Rin, laddie, rin, an' dinna stan' An' stare.as ye were wud, For Gweed forgie's, the sins o' men Hev brocht a second flood.

Rin, laddie, rin to Clochnaben, There's nae a glint to spare, The angels micht rax doon for us Gin we cud but get there.'

Fytte the Third

Shawin' the mishanters occurrin' to Johnny o' Blackness, to Davit o' the Toll o' Feugh, and to Watch o' Gellan, alang wi' a fyou concludin' remarks by the author.

The lowe o' love hed fired the hairt O' Johnny o' Blackness; The tryst wiz set, an' he maun gang To coort Achattie's Jess.

The flame that brent within his briest -His first for maiden fair -As fiercely as a rozet log On winter hearth did flare.

Nae water's wecht cud droon it oot Till it hed droont himsel', An' he wad mak' his wye to Jess,. Though rain in buckets fell.

His muckle coat wis nearly new, His beets were close an' thick, He hed an airm wi' nerves like thairm, A trusty ailken stick;

Wis he to disappoint his Jess For show'rs o' simmer rain? Ae kiss fae her were high reward For nichts o' toil an' pain.

An' hoor intil Achattie's neuk. Wi' Jess upon his knee, That very nicht his rich reward, His taste o' bliss sud be.

Sic thochts as these, sic high resolves, In Johnny's min' prevail, As he in Blackie's kitchen sits, An' sups his brose an' kail.

But when he buckles for the road, An' comes to cross 'The Bum,' It tak's him mair than oxter deep, An' he is fain to turn.

'I daurna gang anither fit, 'Twere death an' naething less' I winna risk to droon mysel' Nae ev'n for sake o' Jess!'

So Johnny he crap hame agen, In spite o' love's desire, An' hang his dreepin' duds to dry Aroon' the chaumer fire.

But sorra tak' the orra man! He spread it far an' near, That Johnny hed set out to court, But tum't agen for fear.

He didna lat ae word escape Aboot the awfu' nicht, But made it seem that Johnny turn't For pure an' simple fricht.

The story spread, the story grew, It cam' to Jess's cars, That Johnny cudna come to court Because o' ghostly fears.

So slander't Johnny got the seck An' so it cam' to pass, The millert o'Tillwhillie woo'd An' mairret Johnny's lass.

My cousin Joseph made a sang To saften Johnny's care, An' I'll insert a copy here, For copies noo are rare.

Song - 'Dowie Johnny.'

The laverock's liltin' i' the lift, The mavis i' the tree, An' gatherin' gear wi' eident thrift, I hear ihe honey bee.

'Fae hill an' dale an' leafy wood

Delightfu' ditties ring; Auld Nature, in her blithest mood, Rejoicin' i' the spring.

But foo do I, alang the Feugh, Sae sadly, lanely stray, An' think o' loupin' owre a heugh, Like honest Duncan Gray?

'Like honest Duncan I've been cross't, An' cross't in love fu' sair! For me my Jessie's hairt is lost, An' lost for evermair!

'The disty millert he's the loon That's stown my gem awa'; O' a' the ills that e'er cam' doon Nae harder ill cud fa!

'My early love, my only ane, That I believed sae true! O' gin I were a bairn again I think I wad boo-hoo!

'I weel cud greet, I weel cud ban, But that sall never be; Whate'er his ills, a manly man Wi' dauntless hairt will dree.

'I'll wuss the millert luck o' Jess, An' whistle care awa'; The back o' ane may noo distress, But prove the face o' twa.'

The tollman at the Brig o' Feugh, He like't the drappie weel, The night afore the spate he drank Till he fell owre the steel.

For souter Spriggs and tailor Twist Hed ca'd to 'weet their mou',' An' they an' Davit teemt the stoup Till a' the three were fou;

An' Davit, when his cronies left, Aneth the table sank, But for his nose ye micht 'a' thocht He'd lost the vital spank.

His wife's attempts to wauken him Owercam' her skill and mettle, So wi' an unco fecht she row't An' trail't him to the settle.

An' then her tartan plaid she threw Abeen the snorin' sot, An' wi' a grunt or twa aboot 'The hardness o' her lot,' She fill't the eelie lamp wi' oil, Pat in a rashen wick, Made doors an' windows but an' ben As fest as they cud steek,

Pat i' the fire a risten-clod, Drew up the asse atap, Then slowly up the stairs to bed Wi' weary steps she crap.

She gaed to bed, but nae to sleep, For aye the rain cam' doon, An' aye the Feugh gaed rairin' past Wi' lood an' looder soun'.

Abeen the brig, abeen the brae, Up to the window sole The water raise, an' filter't in At ilka cranny hole.

The water roun' the settle plashed An hoor ere brak o' day; The tollman wauken't up an' bawl't 'Fair play! my boys, fair play.

I winna drink anither drap! My head is like to rive, An' gin ye jilp it doon rny throat, Then you an' I'll strive.

An' mair nor that, ye've droon't the drink; The fashion o't is oot. It's caul', it's weak, it's waur, I say, Nor water fae the spoot.'

Aul' Eppie here cam' doon the stair Else Davit had been droon't, An' when she saw the state o' things, In fac' she nearly swoon't

O Davit, we're in sic a spate As never yet cam' doon! Come up the stair, ye senseless gowk, Unless ye want to droon.

Ye drunken, doitet ne'er-do-weel Come up the stair at ance! Ere I come at ye wi' a rung An' brak yer lazy banes!

Fat ever keeps ye ficherin' there? Ye're either fey or daft -Gin there be safety i' the hoose It's i' the eemest laft.

That I wis left to mairry you O weary fa' the day!
But yet I dinna want ye droon't Ye're a' the man I hae!

An' there, owermaister't by her grief, A tear ran doon her nose; She micht 'a' ventur't to the deece, But Davit, pechin', rose, An' stoitet farret, sair perplex't, Through water three feet deep Scarce kennin' gin he wis awauk Or dreamin' fast asleep,

Till Eppie got him by the tap An' pu't him up the stair. Quo' Davit then, ' I'm wauken't, wife, Lat go my puckle hair!

I'm wauken't, wife! lat go my hair! Ye're lowsin't at the reet! Quo' Eppie than, 'Come up the stair, Ye gweed-for-naething breet!

Nor farther sall the Muse relate Fat passed atween the pair, But neepers always blamed the spate For thinnin' Davit's hair.

Peer breet, the dog o' Gellan gaed Wi' Tam to Brig o' Feugh, He spies a stick come soomin' doon, Ae word fae Tarn's aneuch,

An' in springs Watch to fetch the stick, An' tulzies lang an' sair, But in a swirl he sinks at last, We saw him never mair.

A dowie, dowie loss to me, An' to my brither Joe, I do believe 'twis full a raith Ere we owercam' the blow,

For aye when we to Gellan gaed Peer Watch wis at the door, An' waggit's tail and lickit's chafts, An' gambols made galore,

As gin he wud 'a' said, ' Step in, I'll follow gin ye please, An' eat the mealocks ye lat fa' Fan ye get bread an' cheese;

For bread and cheese ye're sure to get. A drink o' milk as weel, An' mealocks ye'll lat fa' for me, Else I hae tent my skeel.

Step ben the hoose; yer auntie's in, An' sae 's yer cousin Bell; They're i' the kitchen trockin' baith, I saw them there mysel'

Step in, my bairns, an' get a piece At Gellan we hae raff'. Tak' doon the aul'est kebbock, Bell, An' cut them knievlocks af.'

Nae wunner then though Joe an' I Owre Watch made muckle main, An' mis't him sair at Gellan's door When we gaed back again.

But still the spate made some amends -We captured troots an' eels, And noo an' than a protty grilse For weeks amo' the peels.

Fae brak' o' day till fa' o' nicht Alang the haughs we ran, An' skilpit barefit i' the peels, -O sirs, but it wis gran'!

Ye sud' 'a' seen us wade an' plash, An heard oor shouts ring oot When we espy't a siller grilse, Or muckle yallow troot.

O sirs, it gars me haud my head, To think upo' the time; It chokes my voice, it blin's my een, It drives me aff my rhyme.

An' sae sic samples maun suffice, For mair ye mauna luik, Since ane fa scarce can sing a sang, Wud ill mak' up a buik.

Sic samples,' faith, I fear my Muse Has run at railway speed, An' fyou her 'samples' may peruse, An' fyouer buy her screed.

An' sae I'll en' as I began -In Scotlan's boun's sin' syne, We hinna hed anither spate Like auchteen twenty-nine.